

# TI PANNAKAISUBLI TI EBANGHELIO NI JESUCRISTO





## TI DIOS TI NAAYAT A NAILANGITAN NGA AMAM

Ti Dios ti Amam iti Langit. Personal nga am-ammonaka ken ipatpategnaka iti nalablabes ngem iti matukodmo. Kayatna nga agragsakka iti daytoy a biag ken iti kinaagnanayon.

Tapno maileppasmo daytoy a panggep, nangted ti Nailangitan nga Ama iti plano a maawagan iti **ebanghelio\*** ni Jesucristo. Ni Jesucristo ti Anak ti Dios; ti biag ken dagiti pannursurona ket mangibagnos nga agturong iti talna iti daytoy a biag ken rag-o iti kinaagnanayon.

*Ti Nailangitan nga Amatayo ket nayegnan—naisublinan—dagiti nadosan a kinapudno a mabalinmo a sursuruen ken tungpalen. Naipalgak dagitoy a kinapudno kadagiti propeta manipud pay idi punganay.*

## BENDISIONAN TI EBANGHELIO DAGITI PAMILIA KEN INDIVIDUAL

Bendisionan ti ebanghelio ni Jesucristo ti amin nga umawat ken agtungpal iti daytoy. Maysa kadagiti kasayaatan a lugar a pakaisuruan ken pakayaplikaran iti ebanghelio ket kadagiti pamilia. Impasdek ti Dios dagiti pamilia a mangyeg iti kinaragsak kadagiti annakna, a mangpalugod kadatayo a mangsursuro kadagiti pudno a pagbatayan iti naayat nga aglawlaw, ken mangisagana kadatayo nga agsubli Kenkuana kalpasan ti ipapataytayo. Nupay mabalin a mapannubok dagiti relasion iti pamilia no dadduma, bendisionannatayo ti Nailangitan nga Ama bayat ti panangikarigantatayo a mangsurot kadagiti pannursuro ni Jesucristo. Tulongannatayo dagitoy a pannursuro a mangpapigsa kadagiti pamiliatayo.

## IPALGAK TI NAILANGITAN NGA AMA TI EBANGHELIONA

Kas paset ti planona, pumili ti Dios kadagiti propeta, a kas kada Adan, Noe, Abraham, ken Moises. Dagiti Propeta:

- Isuroda ti maipapan iti Dios ken naisangangayanda a saksi ti Anakna, ni Jesucristo.

\*Nailawlawag ti kaipapanan dagiti balikas a maris nalabaga kadagiti panid 18 ken 19.

- Umawatda iti **paltiing**, wenna pangiturong manipud iti Apo.
- Isuroda ti ebanghelio iti lubong ken ipatarusda ti balikas ti Dios.

Umawat dagiti propeta iti **priesthood**, wenna ti turay nga agsao ken agtignay iti nagan ti Dios a mangidaulo kadagiti annakna. Dagiti tao a mangsurot kadagiti propeta ket umawatda kadagiti bendision nga inkari ti Dios. Dagiti di mangawat iti ebanghelio ken kadagiti propeta ti Dios ket mapukawda dagita a bendision ken mayadayoda ti bagbagida manipud iti Dios. Dagiti saan a mangawat kadagiti propeta ken mangliway iti panagkumitda a mangsurot iti Dios ket addada iti kasasaad a maawagan iti **ikakalilis iti kinapudno**.

**N**apukaw dagiti naipalgak a kinapudno bayat ti saan a panangawat dagiti tao kadagiti propeta.

Nupay adu kadagiti annakna ti nangu-lit-ulit a saan nangawat Kenkuana ken dagiti propetana, agtultuloy nga ayaten ti Nailangitan nga Ama dagiti annakna. Kayatna nga ited kadayo ti amin a banag a kasapulantayo tapno agbalin a naragsak ita ken tapno makasubli Kenkuana kalpasan ti ipapataytayo.

Ipakita dagiti nasantuan a kasuratan ti maysa a pagtuladan ti Dios iti maulit-ulit a panangtulong kadagiti annakna, nupay saantayo a kanayon a dumdumngeg:

- Pumili ti Dios iti maysa a propeta.
- Isuro ti propeta ti ebanghelio ken idauluanna dagiti tao.
- Bendisionan ti Dios dagiti tao.
- In-inut a saan nga ikankano wenna supringen dagiti tao dagiti pannursuro ti propeta. Kamaudiananna saanda nga awaten ti propeta ken dagiti pannursurona ket matnagda iti ikakalilis iti kinapudno.
- Gapu iti ikakalilis iti kinapudno, mapukaw dagiti tao ti pan-nakaammoda iti ebanghelio. Maibabawi ti turay ti priesthood manipud kadakuada.
- No dumteng ti umno a panawen ken nakasaganan dagiti tao a mangsurot manen Kenkuana, pumili ti Dios iti sabali pay a

**Nailawlawag ti kaipapanan dagiti balikas a maris nalabaga kadagiti panid 18 ken 19.**

***Insurat dagiti propeta ti Daan a Tulag dagiti balikas ti Dios.***





propeta, isublina ti priesthood ken ti Simbaan, ket iturongna ti propeta a mangisuro iti ebanghelio.

## IMPASDEK NI JESUCRISTO TI SIMBAANNA

Manipud pay iti panawen ti Panagparsua, pinasungadanan dagiti annak ti Dios ti Mangisalakan a ni Jesucristo. Kas iti inkarina, imbaon ti Nailangitan nga Ama ti Anakna, ni Jesucristo, iti daga nasurok a 2,000 a tawen ti napalabasen.

Nagbiag ni Jesucristo iti naan-anay, awan mulitna a biag. Impasdekna ti Simbaanna, insurona ti ebangheliona, ken nagaramid iti adu a milagro. Nangpili iti sangapulo-ket-dua a lallaki tapno agbalin nga **Apostolna**, agraman da Pedro, Santiago, ken Juan.

Sinuruanna ida ken inikkanna ida iti turay ti priesthood tapno mangisuroda babaen ti naganna ken tapno agaramidda kadagiti sagrado nga **ordinansa**, a kas iti **panagbuniag**.

Idi naipasdek ni Jesus ti Simbaanna, immawat Isuna kadagiti pangiturong manipud iti Nailangitan nga Ama. Kalpasanna sinuruanna dagiti disipulona. Insuro ni Jesus kadagiti pasurotna a ti paltiing manipud iti Dios ket isu ti bato a pangbangonanna iti Simbaanna.

Iti gibus ti biagna, nagsagaba ken natay ni Jesucristo para kadagiti basol ti tunggal maysa a nagnaeden wenna agnaedto iti daga. Maawagan daytoy a sakripisio iti **Pannubbot**. Babaen ti panagsagaba, ipapatay, ken **Panagungarna**, inaramid ti Mangisalakan a mabalina kadatayo ti mapakawan. Dagiti addaan iti pammati Kenkuana, agbabawi, ken agtungpal kadagiti bilinna ket umawatda iti panna-kapakawan dagiti basol ken mapnoda iti talna ken rag-o.

Kalpasan ti Panagungarna, inturong ni Jesucristo dagiti Apostolna babaen ti paltiing. Irekord ti Biblia ti adu a wagas a

**Nailawlawag ti kaipapanan dagiti balikas a maris nalabaga kadagiti panid 18 ken 19.**

**Intalek ni Jesus ti priesthood kadagiti Apostolna.**

### *Binukel ni Jesucristo ti Simbaanna:*

- *Inawagan ken inordenanna dagiti Apostol.*
- *Inikkanna ida iti turay a mangisuro ken mamuniag. Maawagan daytoy a turay iti priesthood.*
- *Kalpasan ti ipapatay ken Panagungarna, intuloyna ti nangiwawan kadagiti Apostol babaen iti paltiing.*

nangituloyanna nga inturong ti Simbaanna (kitaen iti Dagiti Aramid 10; Apocalipsis 1:1). Iti kasta inturong ti Dios ti Simbaan ni Jesucristo ket saan a dagiti tao.

## TI NAKARO NGA IKAKALILIS ITI KINAPUDNO

Kalpasan ti ipapatay ni Jesucristo, pinarparigat ken pinapatay dagiti nadangkes a tao ti adu a miembro ti Simbaan. In-inut nga immadayo dagiti dadduma a miembro ti Simbaan manipud kadagiti pagbatayan nga insuro ni Jesucristo ken dagiti Apostolna. Napapatay

dagiti Apostol, ket ti turay ti priesthood—agraman dagiti tulbek a pangiturong ken pangawat iti paltiing para iti Simbaan—ket naipanaw manipud iti daga. Gapu ta ti Simbaan ket saanen nga maidadauluan babaen iti turay ti priesthood, nagsaknap ti biddut kadagiti pannursuro ti Simbaan.

*Iti ipapatay dagiti Apostol ni Jesucristo, napukaw manen ti kinapudno.*

Nagtalinaed dagiti nasayaat a tao ken ti adu a kinapudno, ngem napukaw ti ebanghelio nga impasdek ni Jesucristo. Maawagan daytoy a panawen iti Nakaro nga Ikakalilis iti Kinapudno.

Nagbanag daytoy nga ikakalilis iti kinapudno iti pannakabukel ti adu a simbaan nga addaan kadagiti agsusupadi a pannursuro. Kabayatan daytoy a panawen, adu a lallaki ken babbai ti nangsapul iti kinapudno, ngem saanda a nabirokan daytoy. Adu a nasayaat a tao ti namati iti Dios ken ni Jesucristo ken pinadasda nga awaten ken isuro ti kinapudno, ngem awananda iti pakabuklan ti ebanghelio wenno turay ti priesthood. Kas bungana, tinawid ti tunggal kaputotan ti kasasaad ti ikakalilis iti kinapudno bayat ti pannakaimpluwensia dagiti tao iti no ania ti impasa dagiti napalabas a kaputotan, agraman dagiti pannakabalbaliw ti ebanghelio ni Cristo.

Sumagmamano a naparegta a tattao, a kas kada Martin Luther ken John Calvin, ti nakailasin a nabalbaliwan wenno napukawen dagiti kannawidan ken doktrina. Inkarigatanda nga ireporma dagiti simbaan a nakaibilanganda. Nupay kasta, no awan ti turay ti priesthood, saan a mabalin a maisubli ti ebanghelio ni Cristo iti sigud a pormana. Maysa a **pannakaisubli** ti kasapulan.

Nailawlawag ti kaipapanan dagiti balikas a maris nalabaga kadagiti panid 18 ken 19.



**A**mmo ti Dios nga addanto  
ikakalilis. Babaen ti maysa a propeta  
iti Daan a Tulag, kinunana:

“Adtoy, umay dagiti aldaw. . .nga  
ipaw-itkonto ti bisin dito daga, saan a bisin iti  
tinapay, wenno waw iti danum, no saan ket a  
panagdengngeg kadagiti sao ni Jehova:

“Ket [dagiti tao] agbariw-asdanto manipud  
baybay agingga iti sabali a baybay, ken  
manipud amianan agingga iti daya,  
agtaraydanto nga agallaalla nga  
agsapul iti sao ni Jehova, ngem  
saandanto a matumpungan.”

**Amos 8:11–12**



## TI PANNAKAISUBLI TI EBANGHELIO

Idi 1820, kas iti inaramidnan iti unos ti pakasaritaan, pimmili manen ti Ama iti Langit iti maysa a propeta a mangisubli iti ebanghelio ken iti priesthood iti daga. Joseph Smith ti nagan dayta a propeta. Kas maysa nga agtutubo a lakali, nariribukan ni Joseph kadagiti panagsusupadi dagiti adu a simbaan iti lugarna ket kinayatna a maammuan no ania a simbaan ti umno. Iti pannakaammona nga agkurang isuna iti kinasirib, sinurotna ti balakad a masarakan iti Biblia, “No siasino man kadakayo ti agkurang iti kinasirib, agdawat koma iti Dios; isu a mangted a sikakaasi kadagiti isu amin, ket saan a mangpabain; ket maitedto kenkuana” (Santiago 1:5).

Inkeddeng ni Joseph Smith a saludsoden iti Dios no ania ti nasken nga arami-denna. Idi nagkararag ni Joseph tapno maammuan ti kinapudno, nagparang ti Nailangitan nga Ama ken ni Jesucristo kenkuana. Imbaga ni Jesus ken ni Joseph a saan a kumappeng iti ania man kadagiti simbaan, ta “biddutda amin” ken “asidegda kaniak iti bibigda, ngem nakayakay ti pusoda kaniak; isursuroda a doktrina dagiti bilin ti tao; addaanda iti nadiosan a langa, ngem iliblibakda ti bileg nga adda iti dayta” (Joseph Smith—Pakasaritaan 1:19).

Kas iti inaramid ti Dios kada Adan, Noe, Abraham, Moises, ken kadagiti dadduma pay a propeta, inawaganna ni Joseph Smith nga agbalin a propeta a babaen kenkuana naisubli ti naan-anay nga ebanghelio.

**N**akita ni Joseph Smith ti Nailangitan nga Ama ken ni Jesucristo. Maipanggep iti daytoy a padas, kinunana:

“Nakitak ti kasla adigi a lawag iti mismo a ngatuen ti ulok, a naranraniag pay ngem init, nga in-inut a nagpababa a nagdisso kaniak. . . .

Nakitak ti dua a Kinatao idi agdisso ti lawag kaniak, nga artapan ti lawag ken tan-okda ti amin a panangiladawan, a nagtakder iti angin iti ngatuek. Maysa kadakuada ti nagsao kaniak, nga inawagannak iti naganko, ket kinunana, intudona ti kaduana—

Daytoy ti Ay-ayatek nga Anakko. Dumngegka Kenkuana!”

**Joseph Smith—Pakasaritaan  
1:16–17**

## Ti Pannakaisubli ti Priesthood

Idi 1829, inawat ni Joseph Smith ti isu met laeng a turay ti priesthood nga inted ni Jesucristo kadagiti Apostolna. Ni Juan Bautista, a nangbuniag ken ni Jesus, ket nagparang ken ni Joseph Smith ket intalekna kenkuana ti **Aaronic Priesthood**, wenna nababbaba a priesthood. Iti saan a nabayag nagparang ken ni Joseph Smith da Pedro, Santiago, ken Juan (tallo kadagiti sigud nga Apostol ni Jesucristo) ket intalekda kenkuana ti **Melchizedek Priesthood**, wenna nangatngato a priesthood.

Kalpasan a naawatna ti turay ti priesthood, nabilin ni Joseph Smith a mangbukel manen iti Simbaan ni Jesucristo iti daga. Babaen kenkuana, nangawag manen ni Jesucristo iti Sangapulo-ket-dua nga Apostol.

*Imbaon ni Jesucristo ni Juan Bautista ket kalpasanna ti tallo kadagiti Apostolna tapno itedda ken ni Joseph Smith ti turay ti priesthood.*

Kas iti panangidaulo ni Jesucristo kadagiti Apostolna babaen ti paltiing kalpasan ti Panagungarna, itultuloyna nga iturong ti Simbaan iti agdama babaen kadagiti sibibiag a propeta ken apostol. Ti Presidente ti Ti Simbaan ni Jesucristo dagiti Santo iti Ud-udina nga Aldaw ti napili a propeta ti Dios ita nga agdama. Isu, dagiti mamagbagana, ken dagiti

Sangapulo-ket-dua nga Apostol ket agikutda iti turay ti priesthood nga inikutan idi dagiti amin a propeta ken apostol kadagiti napalabas a panawen. Dagitoy a lallaki ket propeta, mammaltiing, ken mammadto.

*Naillawag ti kaipapanan dagiti balikas a maris nalabaga kadagiti panid 18 ken 19.*

***Intalek da Pedro, Santiago, ken Juan—dagiti Apostol ni Jesucristo— ti Melchizedek Priesthood ken ni Joseph Smith.***





## TI LIBRO NI MORMON

Kas paset ti Pannakaisubli ti ebanghelio, inyeg ti Dios ti Libro ni Mormon: Mainayon a Pammaneknek ken ni Jesucristo. Babaen ti bileg ti Dios, impatarus ni Joseph Smith daytoy a libro manipud iti nagkauna a rekord a naisurat kadagiti balitok a pina-nid. Ti Libro ni Mormon ket “kasuratan ti pannakilangenlangen ti Dios kadagiti umili iti America idi ugma ket linaonna ti pakabuklan ti agnanayon nga ebanghelio” (pakauna iti Libro ni Mormon).

Ti Libro ni Mormon ket maysa a nabileg a pammaneknek ken ni Jesucristo. Tulongannatayo daytoy a makaawat kadagiti pannursurona, agraman dagiti adda iti Biblia.

Ti Libro ni Mormon ket nakappapati a pammaneknek iti Pannakaisubli ti ebanghelio babaen ken ni Joseph Smith. Maammuan para iti bagim a pudno ti Libro ni Mormon. Tapno magun-odmo daytoy a pannakaammo, nasken a basaem daytoy, utobem ti mensahena, ken tarigagayam a maammuan no pudno daytoy. Nasken a kiddawem iti Nailangitan nga Ama a patalgedanna a balikasna daytoy. Bayat ti panangaramidmo iti kasta, ipalgaknanto kenka babaen iti **Espiritu Santo** a pudno daytoy.

Iti pannakaammom a pudno ti Libro ni Mormon, maammuan to met babaen ti Espiritu Santo a propeta ti Dios ni Joseph Smith, a naisubli ti ebanghelio ni Jesucristo babaen kenkuana, ken idadulan ita nga agdama ti maysa a propeta ken dagiti apostol ti Ti Simbaan ni Jesucristo dagiti Santo iti Ud-udina nga Aldaw.

**M**aammuan a pudno ti insuron dagiti misionario no basaem ken ikararagam ti maipapan iti Libro ni Mormon:

“No naimpusuan ti idadawaty, ken addaan iti pudno a panggep, ken addaan iti pammati ken ni Cristo, iparangarangna ti kinapudnona kadakayo, babaen ti panna-kabalin ti Espiritu Santo.

“Ket babaen ti panna-kabalin ti Espiritu Santo maammuanyo ti kinapudno ti amin a banag.”

**Moroni 10:4–5**

## KASANO A MAAMMUAK?

Maammuum a pudno daytoy a mensahe. No kiddawem iti Nailangitan nga Amam iti kararag, makaawatka iti sungbat manipud Kenkuana babaen iti Espiritu Santo. Maawagan pay iti Espiritu ti

Dios ti Espiritu Santo, ket maysa kadagiti akemna ti agsaksi, wenno agpanek-nek, maipapan iti kinapudno.

Mabalin a datdatlag ken makapagbal-baliw iti biag daytoy a pannakaammo, ngem gagangay a sumangbay daytoy a kas naulimek a pammatalged, nga awan dagiti nakakaskasdaaw a pannakaipakita iti pannakabalin ti Dios. Patalgedan ti Espiritu Santo ti kinapudno babaen kadagiti rikna, pampanunot, ken impresion. Kas naisuro iti Biblia, “Ti bunga ti Espiritu ket ayat, rag-o, talna, mabayag a panagitured, kinaanus, kinalaing, kinamanagtalek, kinaemma, [ken] panagteppel” (Taga Galacia 5:22–23). Dagitoy a rikna manipud iti Espiritu Santo ket personal a paltiing kenka a pudno ti

ebanghelio ni Jesucristo kas naisubli babaen ken ni Joseph Smith. Kalpasanna kasapulamto a pilien no agbiagkanto met laeng a matunos iti pannakaammo a naawatmon.

### **K**asano nga Agkararagak?

- *Awagam ti Nailangitan nga Amam.*
- *Yebkasmo dagiti rikna ti pusom (panagyaman, panagsaludsod, panagkiddaw a mangipatalged iti kinapudno ti Libro ni Mormon ken ti no ania ti insuron dagiti misionario).*
- *Gibusam (“Iti nagan ni Jesucristo, amen”).*





## LISTAAN DAGITI BALIKAS

**Aaronic Priesthood** Ti nababbaba a priesthood. Iraman daytoy a priesthood ti turay a mamuniag ken nanaganan para ken ni Aaron iti Daan a Tulag ti Biblia.

**Apostol** Ti pangawag nga inted ni Jesucristo kadagiti sangapuloket-dua a lallaki a pinilina a kas kasingedan a katulonganna bayat ti panagministrana iti daga ken nangtedanna iti turay nga agtignay iti naganna. Kadagiti kabaruanan a panawen, nangawag ni Jesucristo iti dadduma pay a lallaki nga agserbi a kas Apostolna. Kas kadagiti nagkauna a panawen, ti Apostol ket maysa a naisangsangayan a saksi ni Jesucristo ken addaan iti turay manipud Kenkuana.

**Ebanghelio** Tulongannatayo ti plano ti Nailangitan nga Ama a maaddaan iti talna iti daytoy a biag ken rag-o iti kinaagnanayon. Maisentro ti ebanghelio iti Pannubbot ni Jesucristo ken idawatna a kasapulan kadatayo ti maaddaan iti pammati Kenkuana, agbabawi, agpabuniag, umawat iti Espiritu Santo, ken agibtur agingga iti panungpalan.

**Espiritu Santo** Maawagan pay iti Espiritu Santo, ti Espiritu ti Dios, ken ti Mangliwliwa. Agsaksi, wenna agpaneknek, maipapan iti Nailangitan nga Ama ken ni Jesucristo ken agipalgak ken mangisuro iti kinapudno.

**Ikakalilis iti Kinapudno** No dagiti tao, ti Simbaan, wenna dagiti intero a nasion ket tallikudan wenna baybay-anda ti ebanghelio ni Jesucristo. Agbanag ti ikakalilis iti kinapudno iti saan a panagkaykaysa, pannakatikaw, ken pannakapukaw ti turay ti priesthood, wenna ti karbengan nga agtignay iti nagan ti Dios.

**Melchizedek Priesthood** Ti nangatngato wenna nain-indaklan a priesthood. Nanaganan daytoy para ken ni Melchizedek iti Daan a Tulag ti Biblia, a maysa a nalinteg a nangato a saserdote ken ari.

**Ordinansa** Maysa a sagrado, pormal nga aramid nga annongen ti turay ti priesthood. Maysa a pagarigan ket ti panagbuniag.

**Paltiing** Panagsarita ti Dios ken dagiti annakna, gagangay a babaen iti Espiritu Santo. Makaawat dagiti tao iti paltiing a mangiwanwan iti bukodda a biag, ngem ti laeng propeta a pinili ti Dios ti makaawat iti paltiing para iti intero a lubong. Sumangbay ti paltiing iti adu a wagas, ngem kaaduanna a sumangbay a kas pampanunot, panagrikna, ken impresion.

**Panagbuniag** Maysa a kasapulan unay nga addang iti panangawat iti pannakapakawan kadagiti basbasol. Iti panagbuniag ken kumpirmasion babaen iti turay ti priesthood, agbalintayo a miembro ti Ti Simbaan ni Jesucristo dagiti Santo iti Ud-udina nga Aldaw. Ti panagbuniag ket babaen ti pannakairarem, kaipapananna a ti tao a buniagan ket apagbiit a maipalned iti danum. Ipakita ti panagbuniag ti kinataludontayo a mangsurot iti pagwadan ni Cristo ken mangaramid kadagiti katulagan iti Dios.

**Panagungar** Kalpasan ti pisikal nga ipapatay wenna ipapatay ti bagi, ti pannakitipon manen ti espiritu iti napaan-anay a pisikal a bagi a nagtagilasag ken nagtagitulang. Ni Jesucristo ti immuna a nagungar.

**Pannakaisubli** Panangaramid iti maysa a banag a kas iti sigud; panangipasdek manen iti daytoy; panangisubli manen iti daytoy. Kalpasan ti pannakapukaw ti kinapudno ken turay manipud iti daga, naisubli ti ebanghelio babaen ken ni Propeta Joseph Smith. Ti pannakaisubli ket maigiddiat iti pannakabalbaliw wenna repormasion ta ti *mangbalbaliw* ket kaipapananna ti mangpabaro iti paset ti agdama nga organisasion wenna aramid nga addaan iti panagkagumaan a mangisubli iti daytoy iti sigud a kasasaadna, idinto a ti *mangisubli* ket kaipapananna ti mangipasdek manen wenna mangpabaro manen iti sigud nga organisasion wenna aramid iti pakabuklanna.

**Pannubbot** Ti pasamak a mangpabael kadatayo a makitunos iti Dios. Ti mangsubbot ket mangsagaba iti pannusa gapu iti basol, iti kasta a wagas mangikkat kadagiti bunga ti basol manipud kadagiti agbabbabawi a managbasol. Ni Jesucristo laeng ti agmaymaysa a makabael a mangaramid iti naan-anay a Pannubbot para iti amin a sangkataw-an. Mairaman iti Pannubbotna ti panagsagabana para kadagiti basbasoltayo, ti panagsayasay ti darana, ken ti ipapatay ken Panagungarna. Gapu iti Pannubbot, agungarto ti amin a nagbiagen. Mangted pay kadatayo ti Pannubbot iti wagas a pakapakawanantayo kadagiti basbasoltayo ken makipagnaed iti Dios iti agnanayon.

**Priesthood** Ti turay ken pannakabalin ti Dios. Ited ti Dios daytoy a pannakabalin iti tao tapno agtignay iti naganna. Naisubli ti Aaronic Priesthood ken ni Joseph Smith babaen ni Juan Bautista, a nangbuniag ken ni Jesus. Ti Melchizedek Priesthood ket insubli da Pedro, Santiago, ken Juan, tallo kadagiti Sangapulo-ket-dua nga Apostol ni Jesus.

## MAINAYON A PANAGADAL

Makatulong kenka dagiti sumaganad a saludsod ken nasantuan a kasuratan a mangsursuro iti ad-adu pay maipapan kadagiti pagbatayan iti daytoy a polieto ken mangutob kadagitoy. Saan a nalaka a maawatan ti listaan; dagiti listababa (footnote) ken cross-reference kadagiti nasantuan a kasuratan ti mangiturongto kenka kadagiti mainayon a binatang ken pagadawan.

**Ania ti kaipapanan kenka daytoy, Dios ti Nailangitan nga Amam?**

Malakias 2:10 (Biblia, Daan a Tulag)

Hebreo 12:9–10 (Biblia, Baro a Tulag)

---

---

---

**Ania ti akem ti maysa a propeta? Apay a nasken a maammuan a makisasao ti Dios kadagiti propeta?**

Amos 3:7 (Biblia, Daan a Tulag)

Jacob 4:4–6 (Libro ni Mormon, dagiti panid 155–156)

---

---

---

**Ania ti kaipapanan ti maaddaan iti turay ti priesthood? Kasano ti panangawat ti maysa a tao iti daytoy a turay?**

Mateo 10:1 (Biblia, Baro a Tulag)

Juan 15:16 (Biblia, Baro a Tulag)

---

---

---

**Ania ti mapasamak no mapukaw dayta a turay?**

Amos 8:11–12 (Biblia, Daan a Tulag)

1 Nephi 13:24–29 (Libro ni Mormon, dagiti panid 31–32)

---

---

---

**Ammo kadi dagiti Apostol ni Jesus a mapasamak ti ikakalilis iti kinapudno?**

Dagiti Aramid 20:28–31 (Biblia, Baro a Tulag)

2 Taga Tesalonica 2:2–3 (Biblia, Baro a Tulag)

4:3–42 Timoteo (Biblia, Baro a Tulag)

---

---

---

**Ania ti kaipapanan kenka ti naisublin ti ebanghelio ni Jesucristo babaen ken ni Joseph Smith?**

*Ti Pammaneknek ni Propeta Joseph Smith (polieto)*

---

---

---

**Ania ti Libro ni Mormon? Kasano a saksi daytoy iti awag ni Joseph Smith a kas maysa a propeta?**

Panid ti paulo ti Libro ni Mormon

Pakauna ti Libro ni Mormon

---

---

---

**Ania ti akem ti Espiritu Santo?**

Alma 5:45–47 (Libro ni Mormon, panid 278)

Moroni 10:3–5 (Libro ni Mormon, dagiti panid 677–678)

---

---

---

## MAKIPAGDAYDAYAWKA KADAKAMI

---

UMAYKA KET KITAEM NO KASANO A MABENDISIO-  
NAN TI NAISUBLI NGA EBANGHELIO TI BIAGMO



Ti miting iti sakramento ti kangrunaan a serbisio ti panagdaydayaw. Gagangay nga agpaut daytoy iti nasurok bassit a maysa nga oras ken gagangay a buklen dagiti sumaganad:

*Dagiti himno:* Kantaen ti kongregasion. (Maited dagiti libro ti himno.)

*Dagiti kararag:* Iruknoy dagiti lokal a miembro ti Simbaan.

*Ti sakramento:* Mabendisionan ti tinapay ken danum ken maiwaras iti kongregasion kas panglaglagip iti Pannubbot ni Jesucristo.

*Dagiti Agsarita:* Gagangay a maysa wenno dua nga immuna a natingangan a miembro ti kongregasion ti agsarita maipapan kadagiti topiko ti ebanghelio.

*Kawes:* Gagangay nga agkawes dagiti lallaki iti terno wenno maibagay a pantalon a naternuan iti kamisadentro ken kurbata. Agkawes dagiti babbai iti bestida wenno palda.

Saan a makiddaw dagiti donasion kabayatan dagiti serbisio ti panagdaydayaw.

Awisendaka pay a dumar-ay kadagiti mainayon a miting, a maibatay kadagiti paggugustom ken kagrupom iti tawen. Mabalina nga agduduma ti urnos ken mabalina a pakaangayan dagitoy a miting.

**Sunday School:** Dagiti klase a pagadalan kadagiti nasantuan a kasuratan ken doktrina ti ebanghelio.

**Dagiti miting iti priesthood:** Dagiti klase para kadagiti lallaki nga agtawen iti 12 ken natataengan.

**Relief Society:** Dagiti klase para kadagiti babbaing nga agtawen iti 18 ken natataengan.

**Young Women:** Dagiti klase para kadagiti babbaing nga agtawen iti 12 agingga iti 18.

**Primary:** Dagiti grupo ti serbisio ken klase para kadagiti ubbing nga agtawen iti tallo agingga iti 11. Masansan nga adda Nursery para kadagiti ubbing nga agtawen iti 18 a bulan agingga iti 3 a tawen.



Oras ti miting iti sakramento: \_\_\_\_\_

Adres ti kapilia: \_\_\_\_\_

\_\_\_\_\_

# Ania ti Nasken nga Aramidek?



- Basaen ti Libro ni Mormon.

Dagiti maisingasing a basaen: \_\_\_\_\_

\_\_\_\_\_

\_\_\_\_\_

- Agkararag tapno maammuan a propeta ni Joseph Smith ken balikas ti Dios ti Libro ni Mormon.
- Makimisa.
- Ikeddengmo no surotento ti Mangisalakan babaen ti panagpabuniag. Petsa ti panagbuniag: \_\_\_\_\_

- Bisitaen ti [www.mormon.org](http://www.mormon.org) tapno masursuro ti ad-adu pay maipapan iti naisubli nga ebanghelio ni Jesucristo.
- Itultuloy ti pannakipagkita kadagiti misionario tapno masursuro ti ad-adu pay maipapan kadagiti kinapudno nga insublin ti Dios babaen kadagiti propeta iti kabaruanan a panawen.

Sumaruno a pannakipagkita: \_\_\_\_\_

- Dagiti nagan ken numero ti telepono dagiti misionario: \_\_\_\_\_

\_\_\_\_\_

\_\_\_\_\_

TI SIMBAAN NI  
**JESUCRISTO**  
DAGITI SANTO  
ITI UD-UDINA NGA ALDAW

[www.mormon.org](http://www.mormon.org)

#### Dagiti Pammadayaw iti Ladawan

Akinsango nga akku: *The Lost Lamb*, ni Del Parson. © Del Parson Saan a kopiaen  
Panid 5: Detalye manipud iti *The Prophet Isaiah Foretells Christ's Birth*, ni Harry Anderson  
Panid 6: Detalye manipud iti *Christ Ordaining the Twelve Apostles*, ni Harry Anderson  
Panid 13: Detalye manipud iti *The Restoration of the Melchizedek Priesthood*, ni Kenneth Riley  
Panid 14: Detalye manipud iti *Jesus Christ Visits the Americas*, ni John Scott

ILOKANO



4 02011 56864 5

01156 864